

**De cellularis induratione : dissertatio inauguralis medica ... / auctor  
Fridericus Baermann.**

**Contributors**

Baermann, Friedrich, b. 1792.  
Friedrich-Wilhelms-Universität Berlin.  
Royal College of Surgeons of England

**Publication/Creation**

Berolini : Litteris Augusti Petschii, 1825.

**Persistent URL**

<https://wellcomecollection.org/works/ev7dpfwx>

**Provider**

Royal College of Surgeons

**License and attribution**

This material has been provided by This material has been provided by The Royal College of Surgeons of England. The original may be consulted at The Royal College of Surgeons of England. where the originals may be consulted. This work has been identified as being free of known restrictions under copyright law, including all related and neighbouring rights and is being made available under the Creative Commons, Public Domain Mark.

You can copy, modify, distribute and perform the work, even for commercial purposes, without asking permission.



Wellcome Collection  
183 Euston Road  
London NW1 2BE UK  
T +44 (0)20 7611 8722  
E [library@wellcomecollection.org](mailto:library@wellcomecollection.org)  
<https://wellcomecollection.org>

3  
DE  
TELAE CELLULARIS  
INDURATIONE.

---

DISSERTATIO  
INAUGURALIS MEDICA  
QUAM  
SENSU ET AUCTORITATE  
GRATIOSI MEDICORUM ORDINIS  
IN  
UNIVERSITATE LITTERARIA BEROLINENSI  
UT SUMMI  
IN MEDICINA ET CHIRURGIA HONORES  
RITE SIBI CONCEDANTUR.

*DIE XXI. M. MARTII A. MDCCCXXV.*

H. L. Q. S.

PUBLICE DEFENDET

AUCTOR

*FRIDERICUS BAERMANN,*

BUNDA-GUESTPHALUS.

---

OPPONENTIBUS:

*C. H. EBERMAIER, MED. DR.*

*A. ANDRESSE, D. D.*

*S. F. GOEBEL, MED. CAND.*

---

---

BEROLINI,  
LITTERIS AUGUSTI PETSCHII.

Digitized by the Internet Archive  
in 2016



VIRO

GENERICISSIMO ILLUSTRISSIMO  
EXPERIENTISSIMO

PH. A WALTHER,

MEDICINAE ET CHIRURGIAE DOCTORI, PROFESSORI PUBL.  
ORD. IN UNIVERSITATE LITTERARUM BONNENSI, BORUSSORUM  
ET BAVARORUM REGI A CONSILIIS MEDICIS INTIMIS, CLINICES  
CHIRURGICAE ET OPHTHALMIATRICAЕ DIRECTORI, ORDINIS  
CORONAE BAVARICAE DE MERITIS CIVILIBUS EQUITI, COM-  
PLURUMQUE SOCIETATUM LITTERARIARUM SODALI  
ETC. ETC.

NEC NON

VIRO  
CELEBERRIMO AMPLISSIMO  
EXPERIENTISSIMO

GUILELMO WAGNER,

UTRIUSQUE MEDICINAE ET PHILOSOPHIAE DOCTORI, PRO-  
FESSORI PUBL. EXTRAORD. IN UNIVERSITATE LITTERARUM  
BEROLINENSI, PLURIUM SOCIETATUM LITTERARIARUM  
SODALI ETC. ETC.



PRAECEPTORIBUS ET FAUTORIBUS SUIS

SUMMA VERECUNDIA COLENDIS

HASCE STUDIORUM SUORUM PRIMITIAS

PIO GRATOQUE ANIMO

D. D. D.

AUCTOR.

---

**I**nduratio telae cellularis, textus cellularis durities, cutis tensa — Gallis Endurcissement du tissu cellulaire, oedematie concrète — Anglis Skinbound dicta, morbum significat, aetati infantili fere proprium eumque rariorem, qui modo singulas partes, modo totam corporis superficiem adurit, cujus palmaria symptomata in duritie propemodum lignea, nec non eximia temperiei diminutione cernuntur. Francogalli horum symptomatum gratia infantulos, hoc morbo correptos, des Enfans durs, vel des Enfans gelés, apte dicunt. Generatim morbus iste in Gallia et Britannia frequentius occurrit ideoque a medicis illarum terrarum primo fusius describebatur. In Germania Vir Perillustris ac de medicina Meritissimus Hufeland <sup>1)</sup> primus exstitit, qui medicorum mentes ad hoc vitii genus converteret. Antiquiores quidem Germanorum medici de similibus morbis exposuerunt, inter alios Joh. And. Usenbez <sup>2)</sup> anno 1718 in nosodochio Ulmensi hujusmodi exemplum observavit ac descripsit, verumtamen jam Koch <sup>3)</sup> dubitavit, et Lo-

---

<sup>1)</sup> Neueste Annalen der französischen Arzneikunde und Wundarzneikunst. Leipzig, 1791. I. Bd. S. 342.

<sup>2)</sup> Ephemerid. Nat. Curios. und im Auszuge mitgetheilt in Schurigii Embryologia, Dresden und Leipzig, 1732, Sect. III. pag. 211.

<sup>3)</sup> Auszug aus den Sammlungen auserlesener Abhandlungen für praktische Aerzte. Leipzig, 1796, fünfter Theil, S. 748.



demann <sup>1)</sup> ad evidentiam usque commonstravit, exemplum illud huc referendum non esse. Nullam recipit dubitationem, quin medici veteriores per indurationem telae cellularis diversissimos intellexerint morbos, modoque erysipelas neonatorum, modo tetanum cum ea confuderint. Ne acuta quidem et chronica hujus morbi species prius distinguebatur, licet utraque non solum decursu et majori minorive vitae periculo, verum etiam symptomatibus peculiaribus differat, indolemque maxime diversam exhibere videatur. Quum observationes, a medicis anglicis et gallicis traditas, comparare inciperent, discrimen illud innotuit, miratuque dignum est, Carum <sup>2)</sup> in descriptione exempli hujus generis et in theoria nova de morbi istius indole differentiam illam plane praetermisisse; ab altera autem parte Goelis <sup>3)</sup> et Henke <sup>4)</sup>, quorum ultimus utramque speciem et ejus variètes accuratius comparavit, discriminis supra dicti mentionem fecerunt. Morbi historia, ad conscribendam dissertationem inauguralem a me delecta, etiam atque etiam commonstrabit, indurationem telae cellularis chronicam sane, licet rarius, observari ejusque differentiam ab acuta tantam esse, ut protinus ob oculos cadat. Henke merito forsitan contendit, indurationis telae cellulosae nomen speciei chronicae modo com-

---

<sup>1)</sup> Hufeland's und Himly's Journ. der prakt. Heilkunde. 1810. Stück Oktober. S. 75.

<sup>2)</sup> Neues Journ. der prakt. Heilk. von Hufeland und Harless, XXXV. Band. II. Stück. S. 110.

<sup>3)</sup> Salzburger med. chirurg. Zeitung 1812, I. Bd., No. 9. S. 159.

<sup>4)</sup> Handbuch zur Erkenntniß und Heilung der Kinderkrankheiten, Frankfurt a. M., 1821. I. Band. S. 199.



petere, verumtamen, experientiae exiguae memor, hanc controversiam dirimere non ausim.

Telae cellulosa indurationem non recentioribus morbis adjudicandam, sed jam veteribus observatam, et nomine Stegnosis esse descriptam, Reddelien <sup>1)</sup> demonstravit, quippe qui omnia hac de re a medicis gallicis et britannicis tradita, optime collegit, quibus, jam Galenum hujus morbi mentionem fecisse, patet. Notatu dignum vero est, veteres modo de adultis, minime infantibus, huic morbo obnoxiiis, disserere.

Nunc ad describenda hujus morbi symptomata, quae in specie acuta medicis Gallis, Bordeu, Auvity, Andry, <sup>2)</sup> Souville, Naudeau, Doublet, Chambon, <sup>3)</sup> et Germanis quibusdam observata sunt, gradum facio.

Primis vitae diebus, raro serius, diversae corporis partes, prae ceteris genae, genitalia, artus superiores et inferiores, mira duritiae obsidentur, quacum rubor, magis minusve intensus, fere purpureus, modo totius corporis, modo inferiorum artuum, modo abdominis consociatur; rubente abdomine etiam ventris integumenta indurescunt; rubor raro in violaceum aut lividum abit; sub his artus eximie tument, ut saepe curvati appareant, pedumque plantae non concavae sed convexae cernantur. Partium recensitarum cutis quam maxime tensa, rigida et ligni instar dura, digitorum pressioni nihil cedit, neque huc illuc dimoveri potest. Temperies totius superficiei, maxime

---

<sup>1)</sup> Siehe dessen Sammlung kleiner Abhandlungen und Beobachtungen über die Rose der Neugeborenen und die Verhärtung des Zellgewebes. Lübeck und Leipzig, 1802. S. 81. 82.

<sup>2)</sup> Ibidem.

<sup>3)</sup> Chambon maladies des Enfans. Paris, an VII. pag. 292.



vero partium affectarum, adeo diminuitur, ut frigus glaciale sentiatur, quod modo calore foris admoto evanescit, eoque deficiente, redit. Modo febris adest, modo deest, infantes tactis partibus affectis interdum dolorem sentiunt. Deglutitio et mandibulae motus, nec non artuum, magis minusve praepeditur, imo interdum tetanus et trismus adesse videtur; infantuli vultum attonitum portendunt eorumque clamor ejulatum aemulatur.

Lethalitas hujus morbi tanta ejusque cursus tam acutus est, ut plerisque in exemplis intra quatuor septemve dies mors irruat.

Partes durae tumidaeque, post mortem incisae, humorem flavidum, lymphatico-serosum, calore albuminis instar coagulabilem, vel teste Moscati <sup>1)</sup> serum cruentum effundunt; tela cellularis solida, dura, adeps granulosus reperitur. Vasa per cerebri superficiem discurrentia sanguine scatent, saepeque extravasata ibi inveniuntur. Eadem saepius in pulmonum vasis deprehenduntur, pulmones ipsi haud raro atri, gangraenosi, in cavo thoracis quandoque sanguinis effusiones exstant; neque minus ventriculus maculas gangraenosas offerre solet; hepar solito majus et opacius, vesicula fellea bile atrofusca referta, vasa lymphatica glandulaeque cutis, perinde ac meseraicae, tumefactae sunt.

Praeterea multa referre possem symptomata, septemdecim in exemplis a Viro Illustrissimo et Eruditissimo Dr. Horn <sup>2)</sup> observata; quum vero hicce mor-

---

<sup>1)</sup> Kühn's und Weigel's italienische med. chirurg. Bibl. II. Bd. II. Stück.

<sup>2)</sup> Archiv für medicinische Erfahrung, 1810. II. Band, I. Heft, S. 109.



bus et erysipelas neonatorum pro varietatibus ejusdem speciei ab eo habeantur, obiter modo hanc rem delibare licuit.

Non improbable est, omnes medicos procedente tempore sibi persuasuros esse, speciem acutam indurationis telae cellulosaе cum erysipelate neonatorum conspirare, et utrumque morbum non nisi causarum occasionalium diversitate paululum mutari. Hufeland <sup>1)</sup> jam diu hanc opinionem professus est, et Lodemann, Goelis et Henke nihil dubitationis ea de re movent, omnesque cadaverum incisiones, hactenus institutae, testantur, morbum utrumque easdem mutationes cutis et viscerum, paucis exceptis, proferre.

Symptomatologia speciei chronicae, qualis a medicis britannicis, Underwood, <sup>2)</sup> Denmann et Hulme traditur, multum similitudinis cum superioribus exhibet, verumtamen phaenomena quaedam essentialia offert.

Haec quoque species infantulos paulo post partum adoriri solet, imo nonnunquam cum iis nasci dicitur. Tota corporis superficies, inprimis facies et artus, ingente duritie laborant, cutis tensa haud potest dimoveri, pressioni repugnat, coloremque albo flavidum offert. Totum corpus friget, infantuli modo vagiunt, ac totum per morbum moribundorum faciem repraesentant. Febris et dolor absunt, tetanus et trismus raro accedunt.

Cursus hujus morbi minus acutus, periculum tanto majus, quanto minor infans est natu. In Anglia teste Denmann exitialitas morbi maxima exstitit,

---

<sup>1)</sup> Reddelien Sammlung etc. Vorrede S. IV.

<sup>2)</sup> Ibidem S. 84 etc.



etenim plurium infantulorum modo unum hic medicus morti eripuit; prosperiorem eventum Goelis <sup>1)</sup> assecutus est, etenim quadraginta puerulorum triginta duos incolumes praestitit.

Incisiones partium induratarum, post mortem factae, telam cellularem compactam, sine humoris effusione, exhibent. Hulme tribus in exemplis pneumoniam observavit, quae, ut Reddelien et Lodemann existimant, morbo primitivo serius accessisse videtur, quum ob sanguinis circuitum, in peripheria turbatum, omnis fere sanguis ad interiora propellatur.

---

Causis occasionalibus indurationis telae cellulosaе a variis auctoribus diversae injuriae adnumerantur, quarum palmariae sunt refrigeratio et aëris corruptela; haec corruptela eam ob causam inprimis accusanda videtur, quia in nosodochiis et orphanotropheis morbus hicce frequentissimus saepeque epidemicus observatur. Porro huc referri solent: abusus spirituosorum, a matre commissus, vernix caseosa, in cute residua et corrupta, contagium syphiliticum, hereditate acceptum etc.; multis tamen in exemplis causae occasionales haud innotescunt.

Quum causas occasionales disquirentibus saepe difficultates se obstruant, multo majoribus tenebris ipsa morbi indoles, seu proxima causa, obvelatur, quod theoriae diversae luculenter testantur. Underwood telae cellularis indurationem affectione spasmodica primarum viarum effici, Hulme pro symptomate pneumoniae habendam existimat; Lefebure de Ville-

---

<sup>1)</sup> Med. chirurg. Zeitung 1815. No. 85. S. 128.



brune <sup>1)</sup> vernicem caseosam, in cute nuper natorum relictam, culpat, qua cutis transpiratio supprimatur, eaque suppressa acidum quoddam in tela cellulari gignatur, quo adeps ejus durescat. Argumenti instar profert, candelarum fabricatores adipem mollem admixto acido sulphurico et alumine duriores reddere. Chambon immediatam adipis indurationem, frigore effectam, defendit; Hufeland <sup>2)</sup> naturam scrophulosam huic malo subesse putat; Goelis speciem acutam vehementi cutis inflammationi, chronicam syphilidi originem debere tradit. Stütz <sup>3)</sup> spasmum ait tonicum telae cellulosae subesse, quo simul cellulae singulae humore elastico repleantur. Jahn <sup>4)</sup> nihil nisi erysipelas cum opportunitate in scirrhum abeundi admittit; Lodemann quoad speciem acutam cum Hornio consentit, chronicam vero speciem phlegmatiae albae dolenti aequiparat, exemplumque ab Henkio <sup>5)</sup> descriptum memorat, in quo aegrota dolorem conquesta sit; indolem morbi in processu lymphatico-inflammatorio collocat. Carus prostrationem actionum vitalium in genere, cutisque functionis in specie, culpat morbumque hunc cum enecatione partium singularum et gangraena senili comparat. Henke denique indurationem telae cellularis, erysipelas et icterum recens natorum forsitan varietates injuriarum diversitate effec-

---

<sup>1)</sup> Reddelien l. I. S. 90—94.

<sup>2)</sup> Siehe dessen gekrönte Preisschrift über die Natur, Erkenntniß und Heilart der Scrophelkrankheit. Dritte Auflage. S. 18.

<sup>3)</sup> Hufeland's Journ. der prakt. Arzneikunde. VII. Bd. IV. Stück. S. 42 etc.

<sup>4)</sup> Neues System der Kinderkrankheiten, Rudolstadt, 1807.

<sup>5)</sup> l. I.



tas, ejusdem affectionis primitivae exhibere, quae perversae hepatis functioni indolique sanguinis phlogisticae innitatur, quaque natura abundantiam principiorum phlogisticorum, nempe aquae et carbonis, in cute deponere moliatur.

His evidenter elucescit, et causas et indolem hujus morbi maximis tenebris premi, ideoque certam medendi rationem non posse stabiliri. Obstaculum diagnosis et medelae praecipuum partim in eo est, quod, paucis exceptis, modo tenerrima aetas huic morbo obnoxia est, quo fit, ut medendi ratio caute restringi debeat, partim in eo, quod morbus rarus est acutaque ejus species vulgo tam rapida decurrit, ut mors irruat, priusquam medicamina administrata mutationes idoneas proferre valeant.

Medici gallici fumigationes, corporis lavacra et decoctis herbarum emollientium, balnea cum herba salviae parata et vesicatoria commendant, qua ratione de undeviginti infantulis novem sanatos esse, Andry contendit. Denmann infantem, hausta mixtura absorbente cum spiritu volatili aromatico, sanescere vidit; Moscati remedia evacuantia dein aetherem viatrioli aut spiritum sulphuris aethereum adhibuit; Horn intus mercurium dulcem, emetica, cathartica, diaphoretica, et si affectio subesset spastica, flores zinci et extractum hyoscyami, extrinsecus inunctiones unguenti mercurialis, lavacra et fomenta ex aqua saturnina et aromatica, balnea tepida, saponacea, herbacea et kalina expertus est, sed de septemdecim infantibus non nisi duos salvos praestitit. Goelis speciem chronicam optime mercurialibus curari contendit, quibus, ut supra diximus, effecit, ut de quadraginta infantibus modo octo perirent.



Expositis iis, quae memoratu digna mihi visa sunt, ad singularem morbi historiam describendam me accingo.

---

## MORBI HISTORIA.

---

Augustus Fridericus Gerhard, Berolinensis, annum sextum et tertium mensem agens, normali corporis habitu instructus, testibus parentibus ante initium morbi praesentis valetudine prospera vixit. Variolae prophylacticae, tertio vitae anno ei insitae, rite effloruerunt cursumque absolverunt; reliqui morbi, quibus aetas infantilis solet infestari, ei pepercerunt.

Priori dimidio mensis Augusti anni millesimi octingentesimi vicesimi tertii parentes cum puero naviculam conscenderunt et Treptowiam, quae miliare dimidium a Berolino abest, se devehendos curaverunt. Puerulus totum per diem circa fluvii ripas cum aliis sodalibus lusit, donec parentes inter horam vespertinam decimam et undecimam, eadem navicula vecti, domum redirent. Licet interdum aestus sat magnus exstisset, vespertino tamen tempore aqua temperiem adeo diminuit, ut ipsa infantuli mater horrore quodam agigaretur. Proxima jam nocte somnus pueruli irrequietus fuit, alteroque mane luculenta perfrigerii vestigia apparuerunt, uti cephalalgia, faciei ardor, ciborum fastidium insignisque dolor et rigiditas musculorum cervicis. Haec valetudo ad quartum usque diem perstitit, quippe quo, praeter colli rigorem, symptomata supra dicta sine



medici auxilio evanuerunt, puerique alacritas in integrum restituta est.

Quatuordecim circiter dies post haec eventa, proava manus faciemque nepotis non mediocriter solidescere observavit, eaque de re laetitiam professa est. Eodem fere tempore parentes eximium frigus, per totum pueri corpus diffusum, animadverterunt, quoties, lectulo mane relictio, parentum cubile adire solebat. Ipsi parentes soliditatem illam tendoremque cutis eximio filioli vigori adscripserunt, eoque magis, quum praeter colli rigiditatem nulla labes deprehenderetur. Non multo post autem parentes gressum pueri difficiliorem genuumque mobilitatem ex parte amissam observarunt; praeterea os non rite aperiri poterat cibique duriores tardissime manducabantur. Nunc demum de infantis valetudine solliciti, chirurgum consuluerunt, qui, quamvis se nescisse confitetur, qualis fuerit morbus, tamen e refrigerio ortum putavit, eaque remedia in auxilium vocanda censuit, quae transpirationem cutis suppressam redintegrare valerent. Huic scopo satisfactorius, infusum florum sambuci cum liquore ammonii acetici balneumque tepidum, plures per dies repetendum, imperavit. Quum vero unumquodque balneum morbo incrementa adjiceret, balnea vaporosa iis substituebantur, quae, quoniam effectum haud laetiolem praestiterunt, tandem suspensa sunt.

Quae quum ita essent, valetudo adversa in dies increvit, parentesque egestatis causa ferendis medicamentorum sumptibus non amplius pares fuerunt, quibus rebus coacti, Virum Peritissimum atque Humanissimum Professore Dr. Wagner, cui pauperum cura illius regionis urbanae demandata erat, adierunt, quo



quo factum est, ut mihi, tum temporis Prof. Wagner amanuensi, mirum hocce morbi exemplum innotesceret.

Quum die duodecimo mensis Octobris anni ejusdem aegrotulum inviserem, haec sese obtulerunt: puerulus corpus exhibuit rite conformatum, cujus evolutio, animique dotes aetati bene responderunt. Valetudo universa parum labefacta, ciborum appetitus fere naturalis fuit, difficilique negotio parentes filium in lecto detinuerunt. Morbi interni minime detegebantur, totum vero corpus, exceptis genitalibus, aliquanto tumefactum apparebat, prae ceteris facies, ita ut oculi multo minores viderentur. Color cutis e squalido albus, paulo flavescens, cutis ipsa totius corporis, excepta genitalium cute, partibus subjectis ita superintenta fuit, ut neque huc neque illuc dimoveri posset. Manus admota protinus eximiam temperiei diminutionem per totam corporis superficiem animadvertit, quae diminutio in partibus vestitu non obvelatis, uti in facie manibusque, luculentissima apparuit, quippe quae partes fere congelatis similes fuerunt. Haud minus notatu digna durities partium cuti proxime subditarum exstitit, quarum nonnulla loca, verbi gratia in facie, cervice, natibus et pagina externa artuum superiorum inferiorumque, nullam fere digitorum impressionem receperunt. Minus durae volae manuum, plantae, facies interna artuum et ventris integumenta fuerunt, minimam duritiem partes genitales obtulerunt; foveae tamen admota pressione nusquam remanserunt. Singularis plantarum convexitas haud observabatur.

Quod articulorum mobilitatem attinet, mandibulae et genuum motus maxime praegravatus erat, qua-



propter os parum diduci, alimenta durlora tardissime ac difficillime manducari, genuaque inter ambulandum fere nihil flecti potuerunt.

Circa palpebras notatu dignum erat, quod singulae glandulae Meibomianae extrorsum prominebant, qua de causa non solum numerus, verum etiam situs et figura earum oblonga commode explorabatur. Num haec intumescencia glandulis ipsis, an telae cellulosaе, eas ambiēti, insideret, cum evidentia dirimi nequivit.

His omnibus observatis, nullam dubitationem recipere videbatur, indurationem chronicam telae cellulosaе, si unquam hocce nomine posset designari, illo in exemplo esse agnoscendam. Omnia symptomata multa cum evidentia testabantur, substantiam quandam concretam, quasi rigidam, non modo in tela cellulari, quae stratum internum tegumentorum communium exhibet, sed etiam in ea coortam esse, quae musculos voluntatis imperio subditos comitatur atque investit.

Quum nemini hactenus contigerit, ut causam proximam hujus morbi notatu dignissimi atque mirifici luculenter evincere posset, nostro etiam in exemplo tenebrae illae dissipari nequeunt; licet inficias eundem non sit, causam occasionalem in illo perfrigerio ponendam esse, quod puerulus vespertino tempore in navicula passus est. Sententia Goelisii, qui indurationes telae cellulosaе chronicas syphiliticae originis esse perhibet, huc minime referenda est, quum examen diligentissime institutum docuerit, neque parentes pueruli nostri venereo morbo unquam laborasse, neque infantulum ad hoc usque tempus vestigia morbi obtulisse, qui naturam syphiliticam expromeret.



Multo majori cum probabilitate indoles hujus morbi scrophulosa potest vindicari, quum sequentia diathesin pueri scrophulosam aliquatenus probare videantur. Pater habitum scrophulosum manifestissimum portendit, ipseque confitetur, se a prima inde pueritia, nec non pubertatis periodo absoluta, capitis impetiginibus et glandularum colli tumoribus laborasse, quibus post aliquot annos profligatis, auditus difficilis, nondum curatus, successerit. Idem plures per annos exanthemate faciei pustuloso divexatur, ei non dissimili, quod potatores offendere solet, quamvis iste vir potibus spirituosus minime deditus est. Parentes jam ante annos aliquot infantulum atrophia extinctum luxerunt, aliusque puerulus, duos et dimidium annum natus, longius per tempus scrophulosi exquisita conflictatur, quippe cujus venter glandulis meseraicis tumefactis inflatus durusque observatur, oculi semper inflammatione haud mediocri tenentur; praeterea photophobia ingens, hordeola iterum iterumque redeuntia, et capitis impetigines omnem profligant dubitationem, quae de morbi natura possit moveri. Quodsi his adjicias, scrophulosin ad eos pertinere morbos, qui facillime a parentibus ad liberos transferuntur, opinio supra proposita de diathesi scrophulosa fere ad liquidum perducitur. Hisce omnibus quidem necessitas, indolem scrophulosam indurationis telae cellulosaе chronicae nostro in exemplo agnoscendi, non patet, quamdiu vero morbi alicujus pathogenia summis premitur tenebris, medicus ea arripiat necesse est, quae a probabilitate proxime absunt, ut medendi ratio quodammodo possit stabiliri. Uterque morbus, et scrophulosis et induratio telae cellulosaе, hoc saltem commune habent, quod humorum oppor-



tunitatem ad inspissationem proferunt, et si verum est, quod nemo fere dubitat, morbi scrophulosi indolem in actione systematis lymphatici singulatim alienata ponendam esse, vix diffitendum est, indurationi telae cellularis chronicae disproportionem secretionis et absorptionis maximam subesse.

Jam ad morbi historiam atque medelam revertor. Licet remedia ad restituendam cutis transpirationem administrala, uti supra memoravimus, effectum potius inimicum, quam prosperum exerent, Professor Dr. Wagner a medendi ratione non alienum fore putavit, si illa medicamenta denuo in usum vocarentur. Hocce consilium eo magis persequendum existimavit, quum causa occasionalis manifesta id effecisset, ut transpiratio cutis offenderetur; ceteroquin suspicari licuit, primam horum remediorum administrationem, praecipue balneorum, minus circumspectam fuisse, siquidem homines rerum domesticarum angustius pressi, haud raro negligentiae nimiae indulgent, eoque medici conamina irrita reddunt. Ad usum internum infusum florum sambuci cum vino stibiato imperabatur, vespereque ejusdem diei in cubiculo bene calido balneum tepidum adhibebatur, quibus peractis puerulus, involucro laneo munitus, lectulo tradebatur. Proximo mane haec symptomata apparuerunt: durities ac intumescencia totius superficiei adeo increverant, ut partes antea molliores ligni duritiem exhiberent. Facies rubicunda adeoque tumefacta fuit, ut palpebrae difficillimo negotio aliquantulum aperirentur. Insimul facies et pectus sudore gelido tecta comparuerunt, reliquum corpus aridum, nullam coloris prisci mutationem obtulit. Jam in balneo infans summam



expromsit inquietem, per noctem sollicitus huc illuc corpus jactavit, et, tanquam deliriis vexatus, sermocinatus est. His omnibus praeter vanum humorum impetum versus cutem, maxima sanguinis congestio ad caput indicabatur, quae, saepius iterata, periculum minitabatur, quapropter balneorum usum suspendi necesse visum est. Post aliquot dies quidem balnea vaporosa experiri placuit, sed quum iisdem morbus haud minus exasperaretur, abrogata sunt.

Huc accedit, quod morbi exacerbatio, unumquodque balneum secuta, maximam partem desiit, si aegrotulo venia concedebatur, horas aliquot extra lectulum degendi; his enim factum est, ut durities partium minus correptarum ad gradum pristinum rediret, nec non faciei et reliquarum partium intumescencia decresceret. Generatim temperies modica multo melius, quam calidior, morbo respondere videbatur, etenim durities, quovis mane stragulorum calore adaucta, decrementum exhibuit, si puerulus cubile reliquit.

Ne medendi ratio, ab initio stabilita, protinus abjiceretur, usus diaphoreticorum internus aliquamdiu continuabatur et balneorum loco, corporis frictiones panniculis laneis, mastiche et baccis juniperi suffumigatis, instituebantur. Hac medendi methodo nulla quidem morbi exacerbatio animadvertebatur, sed nihil decrementi obtinebatur, si ab eo discedas, quod os paulo melius aperiri coepisset.

Tum emetica ita in usum vocabantur, ut alternis diebus vomitorium porrigeretur, partim ad actionem systematis lymphatici concussionem corporis salutari adaugendam, partim ad humorum impetum versus cutem irritatione primarum viarum antagonistica



coërcendum. Quinque autem emeticis frustra datis, dies aliquot corporis otio concedebantur, iisque elapsis, mercurius dulcis administrabatur. Inter initia quovis mane et vespere granum ejus dimidium cum sulphure aurato antimonii exhibebatur, et pro potu vulgari decoctum ligni guajaci, radices sassaparillae et radices liquiritiae imperabatur, frictiones autem minime omittebantur. Quum, decem diebus interpositis, neque mercurii efficacia circa morbum, neque symptomata sese manifestarent, quae continuatum hydrargyri usum subsequi consueverunt, bis quotidie granum integrum pro dosi exhibebatur. Sexaginta mercurii grana ab aegrotulo ita hausta sunt, ut ne minima quidem glandularum salivalium affectio appareret, quibus observatio, a multis medicis facta atque defensa, confirmatur, corpus infantile multo minus huic praeparato reniti, quam corpus adultum. Verumtamen morbi decrementum, hujus remedii usu inductum, facile animadvertebatur, nominatim artuum superiorum et pectoris ventrisque integumentorum durities luculenter minuebatur. Os etiam facilius poterat diduci, mobilitasque mandibulae articularumque partium extremarum in melius restituebatur; temperies corporis aliquantum evehebatur, duritiesque non amplius quovis mane incrementa capiebat, quae prius ceperat. Praetermittendum quoque non est, quod novissimo tempore furunculi exigui antibrachia obsiderent, quibus sanatis maculae rubrae, mollitiem cutis naturalem referentes, remanserunt.

Circa hoc tempus evenit, ut praeter alios medicos, qui morbi singularis causa infantulum adirent, Vir Illustris Prof. Dr. Horn eum inviseret, qui, quum Prof. Dr. Wagner lubenter adstipularetur, balnea te-



pida rursus in usum esse vocanda, hunc ad scopum balnea saponacea et furfurea commendavit. Vir Ill. Pochhammer, qui multis re familiari destitutis balneorum usum lubenter offert, huic etiam infantulo id auxilii genus haud recusavit, quo facto aegrotulus statim in balneum deferebatur.

Ut effectus balnei primi rite observaretur, ipse interfui, quum vero puerulus exacerbationis morbi, balneis prioribus ortae, memor esse videretur, plurimi fuit negotii, ei persuadere, ut balneo sine querelis sese submitteret. Hora dimidia elapsa, facies ruberrima et, pariter ac reliquum corpus, paulo tumida apparuit, tantum vero abest, ut duritiei incrementum exstaret, ut partes aliquanto molliores tactu et valetudo universa integra esset. Sudor copiosus, e facie scaturiens, calidus erat, et horae quadrante post balneum interposito reliqua etiam corporis superficies vapore tepido obtegebatur. Omnia haec phaenomena spem suppeditabant, fore, ut continuatus balneorum usus plurimum auxilii esset praestiturus, eventusque his desideriis optime respondit. Usu internorum remedium seposito, balnea alternis diebus ita continuabantur, ut deinceps quinquaginta quatuor eorum adhiberentur. Omnibus in partibus, si eas excipias, quae partim balneorum efficaciam minus validam recipere potuerunt, partim primitus et vehementius affectae fuerunt, durities et temperiei diminutio fere ex toto evanuit, sub quibus sequentia evenerunt symptomata: post sextum circiter balneum, maculae opaco rubicundae, rotundae, arctis limitibus circumscriptae, pollicis diametrum et quod excurrit habentes in artubus superioribus, aliquanto post in inferioribus, novissime in ventre ac dorso apparuerunt,



quae omnis doloris expertes, nec aliquam cutis elevationem, neque temperiei augmentum portendebant duritiemque, haec loca occupantem, profligabant. Aliae earum adeo sibi erant finitimae, ut termini sese tangerent, aliae plane segregatae exstabant. Nec origo, nec discessio earum typo certo adstringebatur, aliae enim post quinque aut sex dies evanuerunt, aliae post decimum diem perstiterunt, omnibus vero desquamatio subtilior epidermidis successit. Interdum plures per dies nullae aderant maculae, sed subito novae apparere solebant. Iis in locis, quibus istae maculae, tanquam liquefacientes, non provenerunt, duritiei decrementum tardius quidem, verumtamen sat evidenter successit, temperiesque et color cutis in dies propius ad normam reverterunt, ita ut aegrotulus, balneis supra memoratis adhibitis, pro sanato fere posset haberi. Faciem quidem et cervicem aliqua obsedit durities, quum balnea, ut supra dictum est, ad hasce partes minus efficaciae exserere possent; eademque ad hodiernum usque diem eatenus tantum diminui potuit, ut puerulo nullas inferat molestias. Praesente tempore infans summa gaudet alacritate, morbusque praegressus neque corporis incremento neque ingenii evolutioni obfuit.

Hanc habeto imaginem fidissimam morbi notatu dignissimi atque rarissimi, a me diligentissime observati, cujus summa est similitudo cum illo exemplo, cujus Henke <sup>1)</sup> mentionem fecit. Utroque in casu occasionales causae, morbi initium et ex parte ejus cursus inter se responderunt, modo aetas aegroti, vitii ambitus et medelae eventus discrepauerunt.

---

<sup>1)</sup> l. l.



Sub finem hujusce historiae observationes quasdam de cursu et singulis morbi descripti symptomatibus adjicere liceat, quae quidem rationes internas, sive indolem, chronicae indurationis telae cellulosaec nec explicant; nec explicare possunt, verumtamen ob rariorem hujus morbi generationem haud supervacuae videntur.

Quum pathologia causas morborum remotas explorari jubeat, nostro etiam in exemplo notandum est, praeter dispositionem scrophulosam hereditariam, a patre acceptam, et praeter causam occasionalem, e refrigerio profectam, nihil reperiri, quod morbum gignere potuerit. Puerulus scilicet, perfrigerium passus, insequente nocte somno irrequieto agitabatur, proximoque mane affectione rheumatico-catarrhali divexabatur. Haec quidem symptomata diebus aliquot interpositis evanuerunt, et telae cellularis induratio post duas demum hebdomades animadvertēbatur, sed haec non impediunt, quo minus morbi initium inde a prima illa valetudine numeremus, quum, elapsis symptomatibus rheumatico-catarthalibus, cervicis rigiditas remaneret, et induratio observata haud mediocrem gradum assecuta esset; praeterea cervix ad eas pertinet partes, quae per totum morbi cursum duritiae maxima et pertinacissima laborabant.

Licet igitur de causa hujus morbi occasionali vix dubitatio aliqua possit moveri, tamen difficillimum est, imo omnes artis fines superat, processum illum internum investigare, quo morbus perficitur. Innumeri homines, tam infantes quam adulti, aestuante corpore perfrigerio sese submittunt, indeque affectionibus rheumaticis, inflammatoriis aut spasmodicis diversi generis subiguntur, neque ullus induratione te-



lae cellularis chronica corripitur. Hanc ob rem diathesis quaedam singularis, detectu difficilis, praecedere videtur, quae magis a textura integumentorum corporis communium, quam ab universi organismi indole pendet. Omnia symptomata huncce morbum comitantia vim vitalem cutis labefactam ejusque functionem turbatam evidenter portendunt, cur vero exigua valetudinis secundae mutatio acciderit, vix dirimi potest.

Si inflammationis notionem, ab omnis aevi pathologis stabilitam, teneas, nostro in exemplo de inflammatione meditandum non est, quippe cujus pathognomonica signa plane defuerunt. Quodsi vero materias rigidas, in tela cellulari depositas, inflammationis, id est exsudationis producta judices, diffiteri nequis, inflammationem non modo per totam superficiem corporis expansam, verum etiam satis gravem existere debuisse. Haec opinio neque cum omnium symptomatum defectu, neque cum exili valetudinis abalienatione conciliari potest.

Summa attentione phaenomena digna sunt, quibus medela insigniebatur. Mercurio enim adhibito, primum furunculi exiles, uti supra memoravimus, dein balneis administratis plures maculae rubrae apparuerunt, in quibus durities liquescere coepit. Furunculi, vitam adauctam quibusdam cutis partibus redditam esse, maculae vero ab inflammatione alienae, materiarum induratarum liquationem et resorptionem contigisse, sanguinisque circuitum in integrum restitutum esse testabantur. Epidermidis desquamatio super his maculis processum quidem inflammatorium supponere videtur, sin mediteris, hanc desquamationem, licet vix manifestam, sanis etiam corpo-



ribus perfici, non inficias ibis, eandem turbata cutis actione restringi, paulo adaucta autem intendi.

Non ignorari oportet, morbi sanationem non nisi per resorptionem contigisse, quibus elucescere videtur, actionem systematis lymphatici diminutam fuisse, quae, administrato mercurio balneisque continuatis, ad gradum normalem sit revocata. Eodem modo explicare potest, cur inter morbi initia, quum resorptio minuta exstaret, omnia medicamina, humorum impetum ad cutem efficientia, prae ceteris balnea, nocuerint, serius vero utilitatem praestiterint, quippe quae mercurii efficaciam juvarent. Balneorum efficaciam particulis kalinis, saponi insitis, ex parte adscribendam esse, pro explorato habeo, siquidem kali in systema lymphaticum vires saluberrimas exerit.



## VITAE CURRICULUM.

---

Ego, Fridericus Baermann, natus sum Bündae, Guestphaliae oppido, die vicesimo secundo mensis Novembris A. MDCCCLXXXII. Ab anno vitae duodecimo parentibus orbatus, Viro praenobilissimo J. F. Hoepker, jam defuncto, omnia debeo, quae ad educationem atque institutionem pertinent. Confessionem evangelicae addictus, in schola urbana non modo primis litterarum elementis imbutus, sed postea etiam privata institutione disciplinis sublimioribus eruditus sum.

Quum animum ad rem salutarem attendissem, et potissimum chirurgiae operam dedissem, annis MDCCCXIII. — XV. Borussorum castra secutus sum. Pace cum Francogallis composita, et missione impetrata, in Batavorum classe chirurgi officia praestiti, et expeditioni, A. MDCCCXVI. contra Afros Algireses susceptae, interfui. Redux in exercitu Borussorum regis, rursus per quadriennium chirurgus militaris stipendia feci, eoque praeterlapso, ut litteris diligentius vacare possem, missionem petii. Ineunte semestri aestivo A. MDCCCXXI. universitatem litterarum Bonnensem adii, examineque anteacto, die duodecimo mensis Julii, Rectore Magnifico Ill.



Mittermaier, Decano Cel. Stein in album universitatis receptus sum. Per hoc semestre, et quod ei antecessit, sequentibus interfui praelectionibus: Cel. Goldfufs de historia naturae universali, speciali, et de Zoologia. Ill. ab Esenbeck de botanice. Cel. Windischmann de historia philosophiae et psychologia. Generos. a Münchow de physice experimentalis. Cel. Weber de osteologia corporis humani et animalium domesticorum. Cel. Mayer de anatomia universa et speciali, nec non de physiologia experimentis juncta. Ill. Nasse de physiologia humana et comparata. Generos. a Walther de chirurgia, morbis oculorum, et de cursu omnium operationum chirurgicarum, cuius etiam clinicum chirurgicum frequentavi.

Auctumno A. MDCCCXXI. Berolinum concessi, et die decimo quarto m. Novembris, Rectore Magnifico Cel. Wilken, Decano maxime spectabili Ill. Link, medicinae studiosus adscriptus sum, quo facto has praelectiones frequentavi: chemiam universam et experimentalem Cel. Mitscherlich, pharmaciam Cel. Turte, botanice et toxicologiam Ill. Link, mentis morbos Exper. Benecke, anatomiam humanam, comparatam et pathologicam Ill. Rudolphi, artem cadavera secandi Ill. Rudolphi et Knape me docuerunt. De materia medica et fontibus medicatis Cel. Osann, de ossium morbis dynamicis Ill. Graefe, de gravissimis achiurgiae capitibus Ill. Rust mihi fuerunt praeceptores. Pathologiam universam, semioticen, therapiam generalem et specialem Cel. Fr. Hufeland, therapiam specialem Perill. C. W. Hufeland, pathologiam specialem et therapiam mentisque morborum curam Ill. Horn me docuerunt. De chirurgia generali et speciali, oculorum morbis, ossium fractu-



ris luxationibusque, et acologia Cel. Jüngken, de medicina forensi Ill. Knape, de medicina forensi et politice medica Cel. Wagner, de arte obstetricia theoretica Gener. a Siebold, de arte obstetricia theoretica et practica Cel. Kluge disserentes audiui.

Institutiones clinicas Perill. Hufeland, Ill. Berends et Ill. Graefe frequentavi.

Tentamine et examine rigoroso absolutis, dissertationem inauguralem conscripsi, eaque defensa fore spero, ut summi in medicina honores benevole mihi deferantur.



---

## THESES DEFENDENDAE.

---

1. *Sensibilis nervorum atmosphaera non exstat.*
  2. *Efflorescentiae cutis acutae febrium exanthematicarum quasi crises sunt.*
  3. *Unicuique medicamini aliud substitui potest.*
  4. *Induratio scirrhusa ab aliis indurationibus non certis notis discrepat.*
-



THESE DEFENDANT

THESE DEFENDANT

THESE DEFENDANT

THESE DEFENDANT

THESE DEFENDANT

THESE DEFENDANT

THESE DEFENDANT